

Յ Օ Բ Ե Լ Ե Ա Ն

ՀԱՄԱԶԳԱՅԻՆ ՅՕԲԵԼԵԱՆ

Անցեալ անգամ խօսելով Բագուի Կուլտ. Միութեան հրատարակչ. սեկցիայի որոշման մասին, մոռացանք յիշել, որ նա որոշել է նաև հիմնել մի տպարան ի յիշատակ մեծ յօբելեանի: Բացի դրանից մեզ հաղորդում են, որ նա որոշել է իր հրատարակութիւնները տարածել հայ ժողովրդի մէջ ձրիաբար և դրա համար մտադիր է կոչ անել հասարակութեան, որ ունևոր անձինք որոշ գումարներ նուիրեն այդ նպատակով:

Ի դէպ պէտք է ուղղենք մի սխալ: Մօպասանի պատմուածքների շարքում յիշված «Սիրելի բարեկամ» պատմուածի ֆրանսիական անունը ոչ թէ «Cher Ami» է, այլ «Bel Ami»:

Ամերիկայի «Ազգ» շաբաթաթերթը ողջունելով համազգային յօբելեանը և դպրոցական Փօնդը, յորդոր է կարդում Ամերիկայի հայ հասարակութեան՝ ջերմ մասնակցութիւն ունենալ:

Որովհետև մեզ դիմում են զանազան կողմերից հարցմունքով, թէ ինչ ձևով պէտք է մասնակցել համազգային յօբելեանին, հոկտեմբերի 12-ին և 13-ին, հարկաւոր ենք համարում յայտնել, որ ամեն մի քաղաքի, աւանի, համայնքի հայերը, անհատները և հաստատութիւնները պէտք է շնորհաւորեն յօբելեանը կաթողիկոսի անունով կամ հեռագիրներով, կամ ներկայացուցիչներով և պատգամաւորութիւններով, իսկ տեղերում պէտք է կազմակերպել հանդէսներ, դասախօսութիւններ, երեկոյթներ, ցերեկոյթներ և պէտք է կատարեն հանգանակութիւն յօգուտ դպրոցական Փօնդի և ուղարկեն էջմիածնի կենտ. յօբել. յանձնաժողովին: Նըւէրները կարելի է ուղարկել նաև «Մշակի» խմբագրութեան, որ կը հասցնէ ըստ պատկանելոյն: Թող ամեն մի անհատ նոյնիսկ իր լուծման ձգէ ընդհանուր զանձանակի մէջ: